

Kristo Ananizawadla Taji na Kinubi

Baada ya hayo nimewekewa taji ya haki, ambayo Bwana, mhukumu mwenye haki, atanipa siku ile; wala si mimi tu, bali na watu wote pia waliopenda kufunuliwa kwake—**2 Timotheo 4:8.**

Kabla ya kuingia katika mji wa Mungu Mwokozi anawapatia wafuasi Wake nembo za ushindi na kuwaweka alama ya hadhi yao ya kifalme. Safu za kupendeza zimeundwa kwa umbo la mraba tupu kumzunguka Mfalme wao, ambaye mwonekano Wake huinuka kwa utukufu juu ya mtakatifu na malaika, ambaye uso Wake unawaangazia upendo mwingi. Katika kundi lote lisilohesabika la waliokombolewa, kila jicho linaelekezwa Kwake, kila jicho linatazama utukufu Wake ambaye “uso Wake ulikuwa umeharibiwa sana zaidi ya mtu ye yote, na umbo Lake zaidi ya wanadamu.” Juu ya vichwa vya washindi Yesu kwa mkono Wake wa kuume anaweka taji ya utukufu. Kuna taji kwa kila mtu, ikibeba “jina lake jipya,” na ikiwa imeandikwa maneno haya, “Mtakatifu kwa Bwana.” Katika kila mkono wa mtu kumewekwa tawi la mtende la ushindi na kinubi king’aacho.

Kisha, wale malaika wenye amri wanapopiga noti, kila mkono unafagia nyuzi za kinubi kwa mguso wa ustadi, na kuamsha muziki mtamu wa wimbo mzuri wa kupendeza. Mlio usioelezeka unasikika na kuusisimua kila moyo na kila sauti inainuliwa kwa wimbo wa shukrani na sifa: “Yeye atupendaye na kutuoshia dhambi zetu katika damu yake, na kutufanya kuwa ufalme, na makuhani kwa Mungu, naye ni Baba yake; utukufu na ukuu una Yeye hata milele na milele.”

Lo, ni furaha isiyoelezeka, kumwona Yeye tuliyempenda—kumwona Yeye katika utukufu Wake ambaye alitupenda upeo hata Akajitoa Mwenyewe kwa ajili yetu—kuitazama mikono ile iliyotobolewa kwa ajili ya ukombozi wetu ikiwa imenyooshwa kwa ajili yetu katika kutubariki na kutukaribisha!

Wale ambao ... watajisalimisha wenyewe mikononi mwa Mungu ... watamwona Mfalme katika uzuri Wake. Watauona uzuri wa furaha Yake isiyo kifani na wakivipiga vinubi vyao vya dhahabu, wataijaza mbingu kwa muziki mzuri uliotukuka na kumsifu Mwana-Kondoo.